



**Siunnersuut uunga: Imigassanik aalakoornartortalinnik nioqquteqartarneq sassaallertarnerlu pillugit Inatsisartut inatsisaata allannngortinneqarneranik Inatsisartut inatsisaat nr. xx, uu. qqqq 2017-meersoq. (Imigassanik kimittuunik kimikittunillu nioqquteqarmi ammasarfiit sivitsorneqarnissaa)**

(Inatsisartunut ilaasortat Randi Vestergaard Evaldsen aamma Justus Hansen, Demokraatit)  
(Siullermeenera)

Demokraatit tunngaviusumik partiuvoq inuit amerlarnarpaartaasa ulluinnarminnik namminneq aqutsinnaanerannik upperinnittoq aamma inuit amerlanerpaartaasa inuunertik namminneq akisussaaffigisinnaavaat.

Ajoraluartumilli inatsisiliortut tamarmik taamaanngillat tamannalu piffissap ingerlanerani inatsiserpaalussuarnik inatsisiliornermik kinguneqarsimavoq inuit ataasiakkaat kiffaanngissusaat mangiartarlugu naak uppernarsaatissaqanngikkaluartoq inatsisiliarineqartoq ilumut sunniuteqartoq.

Tamakkununga ilaavoq imigassaq aalakoornartortalik pillugu inatsit. Ullumikkut imaappoq, imigassanik aalakoornartortalinnik nioqquteqarnermi niuertarfiit ammasarfiit najoqqutarineqanngillat. Politikerimmi aalajangernikuuat, uangut innuttaasut imigassarsisassasugut piffissani aalajangersimasuinnarni. Tamatumunnga ilaatigut tunngavilersuutigineqarpoq tamatumanngooq atornerluineq pinaveersimatikkaa aammagooq imigassanik aalakoornartortalinnik atuineq tamatuma killilersimaarpaa.

Kingulleq eqqussajunnarsimavoq, inerteqquteqarnerup inuit naliginnaat eqqortarmagit sapaammi unnukkorsiornerminni immiartorfimmut viinisorusukkualuartut imaluunniit ikinngutiminnik ataasinnguartoqateqarusukkualuartut, fjernsynerujuutigalutik. Aap, imigassamik atuineq killilersorneqarpoq inunntu naliginarnut. Demokraatini isumarput naapertorlugu tamanna kukkuneruvoq, isumaqaratta inuit ataasiakkaat namminneq inuunertik oqartussaaffigisariaqaraat.

Ammasarfiit nalaani atornerluineq pinaveersimatinneqartarnerseq annertuumik qularaarput. Demokraatini upperingilluinnarparput, niuertarfiup matuata matoqqasup imerajuttoq ataaserluunniit imerunnaartissimassagaa. Aamma upperingilarput tamatumap arlaannaataluunniit pinngitsuuisinnaajunnaarnissaa pinngitsoortissimassagaa.

Paarlattuanilli niuertarfiit imigassanik aalakoornartortalinnik nioqquteqarnerinik killilersuineq unitsinneqartguuppat tamanna arlalinnik iluaqutissarsivigineqarsinnaassagaluarpoq.

Siullermik innuttaasunut kiffaanngissuseqarnea akisussaanerlu utertissavagut. Pisortat aalajangigassarinnigilaat, innuttaasut nioqqutissanik aalajangersimasunik qaqugu pisiniassanersut. Inuit tamanna namminneq aalajangertussaavaat.



Aappaatut qularnaassavarput niuertarfinni "imigassarsiniarlutik tullerriiaartut" pinnginnissaat. Nioqquteqarneq ammaffiup tamarmiusup iluani siammarneqassaaq, tamatumalu kinguneranik aalakoortutik imigassarsiniartut ataatsikkoortarnerat qaqutigoornerulissaaq.

Pingajussaattut imigassanik aalakoornartortalinnik anngiortumik nioqquteqartarneq ullumikkukt sumi tamaani ersinngitsumi pisartoq ullumimut naleqqiullugu killeqalissagaluarpog, paarlattuanik periarfissaalissammat sukkulluunniit unioqqutitsinani pisiniarsinnaanissaaq.

Demokraatinili nalunnigilarput, imigassanik aalakoornartortalinnik nioqquteqarnerup ammavinnissaanut amerlanerussuteqartut akuersitissinnaanagit. Tamanna tunngavigalugu Demokraatit Inatsisartunut ilaasortaataaasa Justus Hansenip aamma Randi Vestergaard Evaldsenip manna siunnersuut saqqummiuppaat, siunnersuummilu saqqummiunneqartumi pineqarpoq, ukiut tallimat matuma siorna Inatsisartuni partiit tamarmik isumaqatigiissutigisinnaasimasaat assinga. Taamani isumaqatigiissutigineqartup piviusunngortinneqarnissaa piffissanngorpoq.

Naalakkersuisut akissutiminni oqaatigaat, Nunarsumi peqqinnissamut suliniaqatigiiffissuup WHO-p innersuussutigigaa, nunani ataasiakkaani pinaveersaartitsinermut atatillugu imigassanik aalakoornartortalinnik nioqquteqarneq killilersimaarniarneqassasoq aamma tamanna atuuppoq niuertarfiit ammasarfiisa sivitsornissaat taamatullu ullut ammasarfiit amerlassusaat eqqarsaatigalugu.

Demokraatini oqaatigerusupparput matumani siunnersuummi pineqarmat isumaqatigiissut WHO-p innersuussutaanik aallaaveqartoq. Siunnersuut akuerineqassappat nioqqutissanut allanut naleqqiullugu imigassanik aalakoornartortalinik nioqquteqarneq suli killilersorneqartussaavoq.

Siunnersuut suliareqqitassanngorlugu Ilaqutariinnermut Peqqissutsimullu ataatsimiititaliamut innersuupparput.